

蓮池讚

蓮池海會

彌陀如來

觀音勢至

坐蓮臺

接引上金階

大誓弘開

普願離塵埃

南無蓮池海會菩薩摩訶薩

三稱

南無蓮池海會佛菩薩
三稱

佛說阿彌陀經

姚秦三藏法師鳩摩羅什譯

如是我聞。一時佛在舍衛國祇樹給
孤獨園。與大比丘僧千二百五十人

俱。皆是。大阿羅漢。眾所知識。長老舍
利弗。摩訶目犍連。摩訶迦葉。摩訶迦
旃延。摩訶俱絺羅。離婆多。周利槃陀
伽。難陀。阿難陀。羅睺羅。憍梵波提。賓

頭盧頗羅墮。迦留陀夷。摩訶劫賓那。
薄拘羅。阿菟樓駄。如是等諸大弟子。
并諸菩薩摩訶薩。文殊師利法王子。
阿逸多菩薩。乾陀訶提菩薩。常精進

菩薩。與如是等諸大菩薩。及釋提桓
因等。無量諸天大眾俱。

爾時佛告長老舍利弗。從是西方。過
十萬億佛土。有世界名曰極樂。其土

有佛。號阿彌陀。今現在說法。

舍利弗。彼土何故名為極樂。其國眾生。無有眾苦。但受諸樂。故名極樂。

又舍利弗。極樂國土。七重欄楯。七重

羅網。七重行樹。皆是四寶。周帀圍繞。
是故彼國名為極樂。

又舍利弗。極樂國土有七寶池。八功
德水。充滿其中。池底純以金沙布地。

四邊階道。金銀琉璃玻瓈合成。上有樓閣。亦以金銀琉璃玻瓈碑磔赤珠瑪瑙而嚴飾之。池中蓮華。大如車輪。青色青光。黃色黃光。赤色赤光。白色

白光。微妙香潔。

舍利弗。極樂國土。成就如是功德莊嚴。

又舍利弗。彼佛國土。常作天樂。黃金

為地。晝夜六時。雨天曼陀羅華。其土
眾生。常以清旦。各以衣祴。盛眾妙華。
供養他方十萬億佛。即以食時。還到
本國。飯食經行。

舍利弗。極樂國土。成就如是功德莊
嚴。

復次舍利弗。彼國常有種種奇妙雜
色之鳥。白鶴。孔雀。鸚鵡。舍利。迦陵頻

伽。共命之鳥。是諸眾鳥。晝夜六時。出
和雅音。其音演暢五根。五力。七菩提
分。八聖道分。如是等法。其土眾生。聞
是音已。皆悉念佛念法念僧。

舍利弗。汝勿謂此鳥。實是罪報所生。
所以者何。彼佛國土。無三惡道。舍利
弗。其佛國土。尚無惡道之名。何況有
實。是諸眾鳥。皆是阿彌陀佛欲令法

音宣流變化所作。

舍利弗。彼佛國土。微風吹動。諸寶行
樹。及寶羅網。出微妙音。譬如百千種
樂同時俱作。聞是音者。自然皆生念

佛念法念僧之心。

舍利弗。其佛國土。成就如是功德莊嚴。

舍利弗。於汝意云何。彼佛何故號阿

彌陀。舍利弗。彼佛光明無量。照十方
國。無所障礙。是故號為阿彌陀。又舍
利弗。彼佛壽命。及其人民。無量無邊
阿僧祇劫。故名阿彌陀。

舍利弗。阿彌陀佛成佛以來。於今十劫。又舍利弗。彼佛有無量無邊聲聞弟子。皆阿羅漢。非是算數之所能知。諸菩薩眾。亦復如是。

舍利弗。彼佛國土。成就如是功德莊嚴。
又舍利弗。極樂國土。眾生生者。皆是阿鞞跋致。其中多有一生補處。其數

甚多。非是算數所能知之。但可以無
量無邊阿僧祇說。

舍利弗。眾生聞者。應當發願。願生彼
國。所以者何。得與如是諸上善人。俱

會一處。

舍利弗。不可以少善根福德因緣。得
生彼國。舍利弗。若有善男子。善女人。
聞說阿彌陀佛。執持名號。若一日。若

二日。若三日。若四日。若五日。若六日。
若七日。一心不亂。其人臨命終時。阿
彌陀佛與諸聖眾。現在其前。是人終
時。心不顛倒。即得往生阿彌陀佛極

樂國土。

舍利弗。我見是利。故說此言。若有眾
生。聞是說者。應當發願。生彼國土。
舍利弗。如我今者。讚歎阿彌陀佛不

可思議功德之利。東方亦有阿閼鞞
佛。須彌相佛。大須彌佛。須彌光佛。妙
音佛。如是等恒河沙數諸佛。各於其
國。出廣長舌相。徧覆三千大千世界。

說誠實言。汝等眾生。當信是稱讚不
可思議功德。一切諸佛所護念經。

舍利弗。南方世界有日月燈佛。名聞
光佛。大燄肩佛。須彌燈佛。無量精進

佛。如是等恒河沙數諸佛。各於其國。
出廣長舌相。徧覆三千大千世界。說
誠實言。汝等眾生。當信是稱讚不可
思議功德一切諸佛所護念經。

舍利弗。西方世界有無量壽佛。無量
相佛。無量幢佛。大光佛。大明佛。寶相
佛。淨光佛。如是等恒河沙數諸佛。各
於其國。出廣長舌相。徧覆三千大千

世界。說誠實言。汝等眾生。當信是稱
讚不可思議功德一切諸佛所護念
經。

舍利弗。北方世界有燄肩佛。最勝音

佛。難沮佛。日生佛。網明佛。如是等恒
河沙數諸佛。各於其國。出廣長舌相。
徧覆三千大千世界。說誠實言。汝等
眾生。當信是稱讚不可思議功德一

切諸佛所護念經。

舍利弗。下方世界有師子佛。名聞佛。
名光佛。達摩佛。法幢佛。持法佛。如是
等恒河沙數諸佛。各於其國。出廣長

舌相。徧覆三千大千世界。說誠實言。
汝等眾生。當信是稱讚不可思議功
德一切諸佛所護念經。
舍利弗。上方世界有梵音佛。宿王佛。

香上佛。香光佛。大燄肩佛。雜色寶華
嚴身佛。娑羅樹王佛。寶華德佛。見一
切義佛。如須彌山佛。如是等恒河沙
數諸佛。各於其國。出廣長舌相。徧覆

三千大千世界。說誠實言。汝等眾生。
當信是稱讚不可思議功德一切諸
佛所護念經。

舍利弗。於汝意云何。何故名為一切

諸佛所護念經。舍利弗。若有善男子。
善女人。聞是經受持者。及聞諸佛名
者。是諸善男子。善女人。皆為一切諸
佛之所護念。皆得不退轉於阿耨多

羅三藐三菩提。

是故舍利弗。汝等皆當信受我語。及
諸佛所說。舍利弗。若有人已發願。今
發願。當發願。欲生阿彌陀佛國者。是

諸人等。皆得不退轉於阿耨多羅三藐三菩提。於彼國土。若已生。若今生。若當生。是故舍利弗。諸善男子。善女人。若有信者。應當發願。生彼國土。

舍利弗。如我今者稱讚諸佛不可思議功德。彼諸佛等。亦稱讚我不可思議功德。而作是言。釋迦牟尼佛。能為甚難希有之事。能於娑婆國土五濁

惡世。劫濁。見濁。煩惱濁。眾生濁。命濁
中。得阿耨多羅三藐三菩提。為諸眾
生。說是一切世間難信之法。舍利弗。
當知我於五濁惡世。行此難事。得阿

耨多羅三藐三菩提。為一切世間說
此難信之法。是為甚難。

佛說此經已。舍利弗及諸比丘。一切
世間天人。阿修羅等。聞佛所說。歡喜

信受。作禮而去。

佛說阿彌陀經

拔一切業障根本得生淨土陀羅尼

南無阿彌多婆夜 哆他伽哆夜

哆地夜他 阿彌利都婆毘 阿彌

唎哆 悉耽婆毘 阿彌唎哆 毘迦

蘭諦 阿彌唎哆 毘迦蘭哆 伽彌

膩 伽伽那 积多迦隸 莎婆訶

三遍

讚佛偈

阿彌陀佛身金色
相好光明無等倫
白毫宛轉五須彌
紺目澄清四大海
光中化佛無數億
化菩薩眾亦無邊

四十八願度眾生 九品咸令登彼岸

南無西方極樂世界 大慈大悲

阿彌陀佛

南無阿彌陀佛

稱念一千或念五百隨意皆得

南無觀世音菩薩

南無大勢至菩薩

南無清淨大海眾菩薩

各十稱

大慈菩薩發願偈

十方三世佛 阿彌陀第一
九品度眾生 威德無窮極
我今大皈依 懺悔三業罪
凡有諸福善 至心用回向

願同念佛人 感應隨時現
臨終西方境 分明在目前
見聞皆精進 同生極樂國
見佛了生死 如佛度一切
無邊煩惱斷 無量法門修

誓願度眾生 總願成佛道

虛空有盡 我願無窮 情與無情

同圓種智

十方三世一切佛 一切菩薩摩訶薩
摩訶般若波羅蜜

三皈依

自皈依佛

當願眾生

體解大道

發無上心

自皈依法

當願眾生

深入經藏

智慧如海

自皈依僧 當願眾生 統理大眾
一切無礙 和南聖眾

回向偈

願以此功德 莊嚴佛淨土
上報四重恩 下濟三途苦
若有見聞者 悉發菩提心
盡此一報身 同生極樂國

佛說阿彌陀經行願儀

清古歙後學沙門成時依經錄輯

行者西向治室，稱阿彌陀佛出入。入時，想云：
「佛告舍利弗：聞是經受持者，及聞諸佛名者，皆為一切諸佛之所護念，皆得不退轉於阿耨多羅三藐三菩提。是故舍利弗，汝等皆當信受我語，及諸佛所說。」想已，即對本師，導師，十方一切三寶，至心唱和云：

一切恭敬 一心頂禮 十方常住三寶

想云：「三寶三德如虛空，眾生三障亦如是。是故平等普歸敬，願速同入法界海。」次起，主者白云：

是諸眾等 各各胡跪 嚴持香華 如

法供養

眾散華，
和云：

供養十方
法界三寶

執鑪
想：

我此香華徧十方云
云。想已，復云：

願此香花雲 徧滿十方界 供養一
切佛 世間難信法 及諸上善人 普
熏諸眾生 皆發菩提心
供養已 一切恭敬

拜。用前總觀偈。下讚歎懺悔三歸
拜處，皆用上偈。次起置鑪讚云：

法寶，僧寶，語局
義通。次起云：

身光不思議 徧照於十方 無量光
如來 西方大慈父 壽命不思議 無
邊阿僧祇 無量壽如來 西方大導
師 國土純清淨 功德所莊嚴 一切
諸群生 悉登不退地 十方恒沙佛

共讚於此邦 故我與眾生 願生極

樂國

拜。想已，次
起拈香云：

一心頂禮 娑婆世界 五濁惡世 本

師釋迦牟尼佛

想身及眾生，業重生惡世。本師大慈，入惡世中，說難

信之法。應極愍傷，感此恩德。想云：「能禮所禮性空寂，感應道交難思議。我此道場如帝珠，釋迦如來影現中。我身影現如來前，為求往生接足禮。」

一心頂禮 東方世界 阿閼鞞佛 須彌相佛 大須彌佛 須彌光佛 妙音佛 如是等恒河沙數諸佛

下偈皆同上，但逐位改名號。想諸佛出廣長舌，覆大千界，說誠實言，勸發往生。應極信受，不敢疑貳。下六拜，悉同。

一心頂禮 南方世界 日月燈佛 名
聞光佛 大燄肩佛 須彌燈佛 無量
精進佛 如是等恒河沙數諸佛

一心頂禮 西方世界 無量壽佛 無
量相佛 無量幢佛 大光佛 大明佛
寶相佛 淨光佛 如是等恒河沙數
諸佛
一心頂禮 北方世界 燄肩佛 最勝

音佛 難沮佛 日生佛 網明佛 如
是等恒河沙數諸佛

一心頂禮 四維世界 最上廣大雲
雷音王佛 最上日光名稱功德佛
無量功德火王光明佛 無數百千俱

胝廣慧佛 如是等恒河沙數諸佛

略準
唐譯

及淨土懺，
總補一禮。

一心頂禮 下方世界 師子佛 名聞

佛 名光佛 達磨佛 法幢佛 持法

佛 如是等恒河沙數諸佛

一心頂禮 上方世界 梵音佛 宿王
佛 香上佛 香光佛 大燄肩佛 雜
色寶華嚴身佛 娑羅樹王佛 寶華
德佛 見一切義佛 如須彌山佛 如
是等恒河沙數諸佛

一心頂禮 西方極樂世界 清旦所

供十萬億佛 及一切時中所供十方

三世一切諸佛

想西方一切眾生，豎窮橫徧而作佛事。如是重重無盡功德，我皆隨喜

。等修供養。
次拈香云：

一心頂禮 西方極樂世界 壽命無

量無邊阿僧祇劫 阿彌陀佛

一往作即報
即法之想。

我及眾生，心性照而常寂，
本與彌陀，契同一體。

一心頂禮 西方極樂世界 光明無

量 照十方國 阿彌陀佛

一往作即法即報之
想。普與眾生，拔

九界苦，得佛界
樂，等蒙光照。

一心頂禮 西方極樂世界 臨命終

時 現前導引 阿彌陀佛

一往作即真即應之
想。願一切處，乃

至臨終，分明覩見，親聆法音。
。倍應雨淚哀切。又拈香云：

一心頂禮 佛說阿彌陀經

此一切世間難信之法。今得信受，應極敬重。想云：「

真空法性如虛空，常住法寶難思議。我皆影現法寶前，
一心如法歸命禮。」 下二拜同。

一心頂禮 稱讚不可思議功德 一

切諸佛所護念經

一心頂禮 西方極樂世界 阿彌陀

佛所說 及十方三世一切尊經

，想導師
本師

，及諸佛法寶
，炳現道場。

一心頂禮 西方極樂世界 光明眾
寶 無量真淨色塵

應預觀成，令禮想時頓現。下五塵，皆阿彌陀佛從我淨

心中變化所作。一一即導師全體法性。想云：「如來法身如虛空，化事住世難思議。我皆影現化事前，一心如法歸命禮。」下四拜，偈同上。

一心頂禮 西方極樂世界 和雅微

妙 無量真淨聲塵

想天樂眾鳥，行樹羅網，無量妙音，及佛菩薩等，所有

一切法音，
悉現道場。

一心頂禮 西方極樂世界 身雲華

雨 無量真淨香塵

想依報正報，一切眾香，悉現道場。

一心頂禮 西方極樂世界 飯食禪

法 無量真淨味塵

想今道場，如在西方，飯食行坐，念佛念法念僧時，不異。

一心頂禮 西方極樂世界 德水微

風 無量真淨觸塵

想今道場，如在西方，澡浴經行，盛華衣食禪觸等時，

不異。次
拈香云：

一心頂禮 西方極樂世界 同佛授
手 觀世音菩薩 大勢至菩薩 及諸
聖眾菩薩摩訶薩

願一切時，及臨命終，分明覩見。

一心頂禮 西方極樂世界 諸上善

人 一生補處菩薩摩訶薩 想無量無邊阿僧祇等覺大士，同

時安慰
授手。

一心頂禮 西方極樂世界 無量無
邊諸大菩薩摩訶薩

一心頂禮 西方極樂世界 阿鞞跋
致 同佛壽命 十方往生菩薩摩訶
薩
一心頂禮 西方極樂世界 無量無
邊聲聞弟子 諸大菩薩摩訶薩

雖證小果，實
似位菩薩。

一心頂禮 極樂世界 欄楯行樹中

諸菩薩摩訶薩

想無量欄楯行樹，炳現道場。我同在
其中，頂禮受法。以下悉同此意。

一心頂禮 極樂世界 寶池蓮華中

諸菩薩摩訶薩

一心頂禮 極樂世界 階道樓閣中

諸菩薩摩訶薩

一心頂禮 極樂世界 黃金地上 娛

天華樂 諸菩薩摩訶薩

一心頂禮 極樂世界 盛眾妙華 廣

修佛事 諸菩薩摩訶薩

一心頂禮 極樂世界 飯食經行 諸
菩薩摩訶薩

一心頂禮 極樂世界 聞音正念 諸
菩薩摩訶薩

一心頂禮 極樂世界 無有眾苦 但

受諸樂 一切菩薩摩訶薩

一心頂禮 文殊師利法王子 阿逸

多菩薩 乾陀訶提菩薩 常精進菩

薩 如是等諸大菩薩 及十方三世

一切菩薩摩訶薩

諸菩薩同受佛語，同生西方，同垂接引。下同。

一心頂禮 舍利弗尊者 迦葉尊者
阿難陀尊者 如是等諸大弟子 及
十方三世一切聖僧

想偈已，復想云：「我及眾生，無始常為三業六根重罪所障。不見諸佛，不知出要。但順生死，不知妙理。我今雖知，猶與一切眾生，同為一切重罪所障。今對彌陀

，十方佛前，普為眾生，歸命懺悔。唯願加護，令障消滅。」想已，跪云：

普為法界一切眾生 悉願斷除三障 歸命懺悔

叩。想云：「我與眾生，無始來今，由愛見故，內計我人。外加惡友。不隨喜他一毫之善。唯徧三業，廣造眾

罪。事雖不廣，惡心徧布。晝夜相續，無有間斷。覆諱過失，不欲人知。不畏惡道。無慚無愧。撥無因果。故於今日，深信因果。生重慚愧。生大怖畏。發露懺悔。斷相續心。發菩提心，斷惡修善。勤策三業，翻昔重過。隨喜凡聖一毫之善。念十方佛，有大福慧。能救拔我，及諸眾生。從二死海，置三德岸。從無始來，不知諸法本性空寂，廣造眾惡。今知空寂，為求菩提。為眾生故，廣修諸善，徧斷眾惡。唯願十方諸佛，彌陀世尊，慈悲攝受，聽我懺悔。」想已，仍跪於地，復叩云：

（懺悔之辭經無明文可採，故敬用慈雲小懺文。）

至心懺悔 我弟子某甲 及法界眾生

從無始世來 無明所覆 顛倒迷惑
而由六根三業 習不善法 廣造十
惡 及五無間 一切眾罪 無量無邊

說不可盡 十方諸佛 常在世間 依
正莊嚴 法音不絕 妙香充塞 法味
盈空 放淨光明 照觸一切 常住妙
理 徧滿虛空 我無始來 六根內盲
三業昏闇 不見不聞 不覺不知 以

是因緣 長流生死 經歷惡道 百千
萬劫 永無出期 經云 毗盧遮那
徧一切處 其佛所住 名常寂光 是
故當知 一切諸法 無非佛法 而我
不了 隨無明流 是則於菩提中 見

不清淨 於解脫中 而起纏縛 今始
覺悟 今始改悔 奉對_叩諸佛 彌陀
世尊 發露懺悔 當令我與法界眾
生 二業六根 無始所作 現作當作
自作教他 見聞隨喜 若憶不憶 若

識不識 若疑不疑 若覆若露 一切
重罪 畢竟清淨 我懺悔已 六根三
業 淨無瑕累 所修善根 悉亦清淨
皆悉迴向 莊嚴淨土 普與眾生 同
生安養_卍願阿彌陀佛 常來護持 令

我善根 現前增進 不失淨因 臨命
終時 身心正念 視聽分明_叩面奉彌
陀 與諸聖眾 手執華臺 接引於我
一剎那頃 生在佛前 具菩薩道 廣
度眾生 同成種智

應三說，次
起唱和云：

懺悔發願已 歸命禮阿彌陀佛 及 一切三寶

想導師處中，為我作懺悔主。一切三寶，同為證明。想偈已，次起立執鑪。想上三寶罌塞道場。我身語意，如影響燄。若一若多，無雜無障。旋繞法座，安詳而轉。

稱云：

南無十方佛

悉稱讚淨土者。

南無十方法

一切世間難信之法，即法界海。十方法門，無不從此法界流，無不還歸此法界。

南無十方僧

此土西方，十方一切僧寶，悉趨向淨土者。

南無本師釋迦牟尼佛

三稱

南無極樂世界阿彌陀佛

三稱

南無一切諸佛所護念經 三稱

南無觀世音菩薩 三稱

南無大勢至菩薩摩訶薩 三稱

誦彌陀經，誦畢復三稱。稱

誦時，隨文入觀，歷歷分明。然名句文，猶空鳥跡，不可思議。故能徧十方界而作佛事。次歸位置鑪云：

自歸於佛 當願眾生 體解大道 發

無上心

自歸於法

當願眾生

深入經藏

智

慧如海

自歸於僧

當願眾生

統理大眾

一

切無礙
和南聖眾

次別處西向，如法端坐，執持名號。一心不亂。其觀道，略引要解於下。

經云：不可以少善根福德因緣，得

生彼國。

菩提正道名善根，即親因。種種助道施戒禪等名福德，即助緣。聲聞獨覺菩提，名少善

根。人天有漏福業，名少福德。唯以信願持名，則一一聲悉具多善因福緣也。若有善男子

善女人，聞說阿彌陀佛_{慧聞}，執持名

號^{慧思}。若一日，若二日，若三日，

若四日，若五日，若六日，若七日

，一心不亂^{慧修}。其人臨命終時，阿

彌陀佛與諸聖眾，現在其前。是人

終時，心不顛倒，即得往生阿彌陀
佛極樂國土。要解云：阿彌陀佛，
是萬德洪名，以名召德，罄無不盡。
故即以執持名號為正行，不必更

圓極語

不可忽過

涉觀想參究等行。至簡易，至直捷

◎確極

◎不可違

也。聞而信，信而願，乃肯執持。
不信不願，與不聞等。雖為遠因，
不名聞慧。執持，則念念憶佛名號

，故是思慧。然有事持理持。事持者，信有西方阿彌陀佛，而未達是心作佛，是心是佛。但以決志願求生故，如子憶母，無時暫忘。理持

者，信西方阿彌陀佛，是我心具，
是我心造，即以自心所具所造洪名
為繫心之境，令不暫忘也。利根一
日，鈍根七日，中根二三四五六日

，而得不亂。

此初學要期法。亦是隨樂剋期之法。

又利根七

日，鈍根一日，中根六五四三二日

，而能不亂。

此久學練習法。上一二種，若七日未辦，乃至多七，一一七中，咸分利

鈍。此長期剋辦之法。

一心亦二種。不論事持理持

，持至伏除煩惱，乃至見思先盡，

皆事一心。又不論事持理持，持至

心開見本性佛，皆理一心。一心是所顯，非所生。

蓋不論雜亂垢心，從來是一心，本不可亂，但迷強不顯耳。事一心不為見思

所亂，理一心不為二邊所亂，即修
慧也。不為見思亂，故感變化身佛
及諸聖眾現前。心不復起娑婆界中
三有顛倒，往生同居方便二種極樂

世界。不為二邊亂，故感受用身佛
及諸聖眾現前。心不復起生死涅槃
二見顛倒，往生實報寂光二種極樂
世界。當知執持名號，既簡易直捷。

，仍至頓至圓。以念念即佛故。不

圓極語

勞觀想，不必參究，當下圓明無餘。

無欠。上上根不能踰其闕，下下根

念念即佛故

亦可臻其闕。可謂橫該八教，豎徹

五時。所以徹底悲心，無問自說。

且深歎其難信也，蓋所持之名號，

真即我心性實不可思議。能持之心性，亦真

實不可思議。即佛名號持一聲，一聲不可思即佛

議。持十百千萬無量無數聲，聲聲即佛皆不可思議也。餘如要解所明，須
悉研之。

佛說阿彌陀經行願儀